

13.maj 2015

Apeqquteqaat tunngavigalugu oqallittoqarnissaanik siunnersuut, qanoq iliornikkut aalisartunut piniartunullu atortuminnik piniutiminnillu ajunaarnersuaqartillugu annaasaqarsimasunut pisortaniit ikiorsiisarnerep nukittorsarneqasinnaanera pillugu.

(Inatsisartuni ilaasortaq Anthon Frederiksen, Partii Naleraq)

Siumumiit Anthon Frederiksen-ip apeqquteqaat aallaavigalugu oqallinnissamik siunnersuutaanut qujavugut imatullu oqaaseqarfigissavarput.

Siullermik Siumumiit oqaatigissavarput nalinnginnaasumik tamatigut nammineerluni sillimaser-simanissaq inuit ataasiakkaat qulakkeersimassallugu pisussaaffigimmassuk.

Taama oqaseqareerluta Naalakkersuisut oqaaseqaatimninni soorlu oqaatigigaat, ilisimavarput atortut aseroriataarsinnaanerat eqqarsaatigalugu ajornanngittumik sillimmasiisoqarsinnaammat.

Taamaattoq aamma ilisimavarput sillimmatit immikkut ittumik pisoqarsimatillugu sillimmasiinermi isumaqatigiissut naapertorlugu atorunnaartarnerat, uanilu oqallisissiap aallavittut taakkartugaa, sior-na anorersuarneratigut aalisarnermut pinianermullu atortuminnik annaasaqarsimasut silap pissusaata peqqarninnera toqqammavigalugu annaasaqarneq pinngitsoorneqarsinnaanngitsutut nalilerneqarsi-masog paasivarput, tamannalu toqqammavigalugu oqallinnermi allaaviusut taperneqarsimasut.

Siumumiit isumaqarpugut nunatsinni silap pissusaanik toqqammaveqartumik allatigulluunniit inuup aqussinnanngisaannik *“ajunaarnersuaqartillugu”* atortutigut annaasaqarnermi inuussutissarsiorsin-naajunnaarnermi inuussutissarsiummik aallartitseqqinniarnermi aaqqissuussineq soorunami eqqar-tussallugu nunatsinni peqqarniissinnaaqisumi pissusissamisoortoq.

Nangillugu Siumumiit Naalakkersuisunut kaammattuutigerusupparput Danmarkimi *“Stormflods-ordning”* qanoq atortinneqarnerisog misissoqqullugu, tassungalu atatillugu eqqarsaatigeqqullugu Danmarkimi Stormrådemut assingusumik nunatsinni pilersitsisoqassappat naapertuunnersog ilanngullugu.

Siumumiit *“Stormflodsordning”*-itut ittumik nunatsinni pilersitsisoqarnissaannik immaqa *“ulus-saarsuortoqartillugu ikiorsiisarnissamik aaqqissuussineq”*-mik taaguuserlugu piffissami allami uunga assingusumik oqallinnerup nanginnerani sukumiisumik Inatsisartuni eqqartuisoqassappat, Siumumiit peqataassaagut tamassuma naleqquttuunera nalersueqataaffigalugu, tassami Inatsisartut inatsisaat nr. 3, 21. Maj 2004-meersumiit naleqqunnerusumik aaqqissuussissagutta, qulaajagassat annertuut eqqartoqqaarneqartariaqarput.

Aamma eqqaamassavarput nunatsinni inatsisit, ingerlatsinermilu periuitsit Danmarkimiit allanngor-tinngivillugit nuuinneqartarnerat akerleralugu qangali partiinit tamanit eqqartorneqartarmat, tamanna toqqammavigalugu Naalakkersuisunit nalilersorneqarnissaa kaammattuutigeqqaarparput.

Siumumiit oqallisissiamik saqqummiussisup nammineerluni tunngavilersuisimannginnera qanorlu oqallisissiap qulequtaa naapertorlugu oqallinnissamik siunnersuutimigut nukittorsaatissamik saq-

qummiussinnginnera tupigikujukkatsigu oqaatigissavarput, tassami issuaasimanera eqqaasanngikkaanni, saqqummiussai aaqqiissutissatut taaneqarsinnaasut tassatuaapput,

aqutsisoq issuaalarpunga -

“Uagut Partii Naleqqami isumaqarpugut Naalackersuisunit akissutaasut Inatsisartuni peqqissaartumik oqaluuserineqartariaqartut, aammalu suliami isummertoqartariaqartoq. Partii Naleqqami assut pingaartipparput iliuuseqartoqartariaqarnera, pisortanit ikiorsiisarnermut aalajangersakkat aqutigalugit aalisartunut piniartunullu ikiorsiisinnaaneq nukittorsaavigiumallugu¹”.

Issuaaneq naavoq.

Siumumiit isumaqarpugut oqallisissiaq taama pingaaruteqartigisoq siunnersuuteqartup minnerpaaffiatigut aaqqiissutissanik siumut isigisunik tigussaasunillu nukittorsaataasinnaasunik saqqummiussisimasaqaraluartoq, § 37 apeqquteqaat aallaavigalugu Naalakkesuitu akisuteqaataat issuaavigiinnarnagu, tamannali Siumumiit uniffiginngilarput, oqallisissiarmit pingaaruteqarpoq.

Naggataatigut Siumumiit oqaatigissavarput aalisartut, piniartut nunalerinermillu inuussutissarsiu-teqartut inuussutissarsiumminnik ingerlatsinerminnut atortorissaarutiminnik annaasaqartut Inatsisartut inatsisaat nr. 3, 21. Maj 2004-meersumi piumasaqaatit naapertorlugit ikiorserneqarsinnaasut ikiorserneqartassammata.

Taama oqaaseqarluta Inatsisartuni ilaasortap Anthon Frederiksen-ip siunnersuutaa nangillugu isummensorfigissagatsigu oqaatigissavarput

Nikolaj Jeremiassen
Siumut

¹ Anthon Frederiksen-ip siunnersuutaani oqaaseqatigiit kingulliit siuliinit tigulaagaq